

Hues a reduci exigencia di 6 aña

Homber cu a abusa di su yiu muhe menor di edad condena na 4 aña di prizon

ORANJESTAD – Aunke cu Hues ta haya e homber F. culpabel, e no a sigui e exigencia di Fiscal cu a exigi 6 aña di prizon pa F. cu a abusa di su yiu muhe menor di edad durante 6 aña.

Abusado condena

Manera Bon Dia Aruba a publica, ayera mainta F. a presenta den Corte pa scucha su sentencia. Hues a bisa cu e ta haya legalmente proba cu F. durante 15 september 2007 y april 2013, diferente biaha a mishi y penetra su yiu muhe menor di edad.

E acusacion tabata parti den dos seccion esta un parti cu ta trata e abuso cu a tuma lugara ora cu e mucha tabatin menos cu 15 aña y e di dos parti

tabata ora cu e mucha tabatin mas cu 15 aña pero ainda menor di edad.

Hues a condena totalmente loke F. a haci cu su yiu y ta haya cu mester condena F. na castigo di prizon pa tempo largo.

Castigo

Pa cu e castigo, Hues a bisa cu e ta tene cuenta cu F. a abusa di su yiu desde cu e mucha tabatin 10 aña. Hues a muestra cu F. a convence su yiu cu e echonan condenabel aki tabata normal. Hues ta haya cu F. a abusa di e confianza cu su yiu mester tin den dje como tata. El a bisa cu e ta haya cu e yiu tabata den un posesion hopi dificil y cu F. a viola severamente e integridad di e mucha.

Hues ta haya cu F. a concen-

tra mas riba su deseo personal y no a preocupa cu su yiu mes. Hues a bisa cu ta conoci cu mucha cu wordo abusa di e forma aki, por keda afecta pa resto di su bida. E mucha por keda den un trauma cu e no kier tin relacion.

Hues a sigui bisa cu loke F. a haci, a causa conmocion den comunidad. El a tene cuenta cu F. ta un first offender. Hues a tuma F. na malo cu durante tratamento di e caso, F. no ta reconoce su culpabilidad sino tira culpa riba su yiu. Hues a condena F. na 4 aña di prizon, kitando e tempo cu e ta cera den KIA. Por a nota cu F. tabata sinta cabes abao ta scucha su sentencia y a cana sali cabes abao tambe.

Manera ta conoci, ley ta per-



miti pa Fiscal apela e sentencia si e ta sinti pa esey. E apelacion lo mester sosode den 2

siman. Tempo lo muestra si e caso aki lo bay Corte Superior of no. □